



# Cook Islands Christian Church

## NEWSLETTER NUMER 14

(published 23 November 2007)

**CICC Vision:** "To worship and serve God, and to make Jesus known to all people. Ko te akamori e te tavini i te Atua na roto i te akakiteanga ia Iesu Mesia ki te au tangata ravarai."

E Nuti Evangelia na te Akonoanga Keresitiano o te Kuki Airani (CICC) ki te au:

- ✓ Tavini rave angaanga katoatoa i roto i te au Ekalesia CICC i te Kuki Airani nei, Nuti Reni, Autireria e Tahiti
- ✓ Mema CICC katoatoa i roto i te au Ekalesia tatakitai
- ✓ Taeake ma te au tuaine i roto i te akarongo

### I ROTO I TEIA NUTI LETA:

- ★ Nuku tei raveia ki Rarotonga
- ★ Uipaanga Maata 2009
- ★ Tere iriiri kapua no te kumiti akaaere ki Nuti Reni
- ★ Mata ou i runga i te kumiti akaaere
- ★ Terms of reference of church posts: urianga ki roto i te reo Maori
- ★ Apiianga ki Takamoa
- ★ Orometua tiaki i te Ekalesia Oneroa
- ★ Tere o te Avarua Girls' Brigade Company ki Oneroa
- ★ Tere no Enuamanu ki Nuti Reni e Autireria
- ★ Araveianga i Mangaia
- ★ Nuti no Takamoa
- ★ Te Ekalesia Dulwich Hill kua aere ki tona rekarekaanga
- ★ Akapapa'anga tuatua no Papa Tuti Taringa

### ANY COMMENTS?

Send to CICC Administration on: [adminpub@oyster.net.ck](mailto:adminpub@oyster.net.ck)  
or the Editor on: [ngam@oyster.net.ck](mailto:ngam@oyster.net.ck)

Printed and distributed from the CICC Headquarters, Takamoa, Rarotonga  
Phone: 26546 Fax: 26540 Email: [adminpub@oyster.net.ck](mailto:adminpub@oyster.net.ck) P.O. Box 93, Rarotonga

# CICC NUTI LETA 14

Akapapaia e Nga Mataio, Tekeretere Maata

## 1. AKATOMO'ANGA

Ko te aroa mou teia, kare na tatou i aroa atu iaia. Kia orana e te iti tangata no te Atua. E tau ia tatou kia akameitaki i te mana katoatoa koia tei oronga mai i teia tikaanga manea kia aravei akaou tatou na roto i teia pepa akakitekite no te 14 o te taime.

Me e au nuti ta kotou tei anoano kia tauruia ki roto i teia au tataanga ki mua, tuku mai kiaku me kore ki to tatou opati i Takamoā. Kia tika katoa akatotoa iatu teia karere ki to kotou au taeake kia kite katoa ratou i te tupu nei i roto i ta tatou akonoanga CICC. Ko kotou kare i kite ana i te au nuti leta i mua atu e kua anoano kotou kia kite, aravei atu i te Orometua o taau Ekalesia me kore akakite mai kiaku; ka rauka oki te reira au nuti leta i te tuku iatu na runga i te email.

## 2. NUKU TEI RAVEIA KI RAROTONGA

Kua akamaara nga Ekalesia e 6 i Rarotonga nei i te ra taeanga Evangelia o te Kuki Airani i te Varaire 26 Okotopa 2007 ki te apii Takitumu Primary School i Matavera. Kua riro e na te Ekalesia Matavera i akateretere mai i te au angaanga o te reira ra, koia katoa oki te akatere o te Konitara Ekalesia Rarotonga i teia mataiti 2007.

Kua akamou te **manako maata** (theme) o te nuku no teia mataiti ki runga i **te tupuanga o te Evangelia ora a Iesu Mesia i te Kuki Airani**. Teia te au tuanga tei orongaia ki nga Ekalesia kia akatutu mai:

<b>Matavera</b>	Te taeanga mai o te Evangelia ki Rarotonga
<b>Avarua</b>	To te Evangelia akatinamouanga i tona tango ki runga ia Rarotonga (mataiti 1823 – 1900)
<b>Nikao</b>	Te akatotoaiaanga o te Evangelia mei Rarotonga ki te au pa enua mamao (Vanuatu, New Caledonia, Papua New Guinea)
<b>Arorangi</b>	Te matutuanga o te Evangelia i Rarotonga (mataiti 1900 – 1970s). <i>Kare a Arorangi i apai i teia, kua akatutu mai ra aia i te taeanga te Evangelia ki Aitutaki.</i>
<b>Titikaveka</b>	Te tamanamanataangaia te tupuanga o te Evangelia i Rarotonga, e pera te au ravenga akatanoanga
<b>Ngatangia</b>	Te Evangelia e 50 mataiti mei teia ra (2057), eaa ra tona turanga

Kua riro ta nga Ekalesia i akatutu mai ei pumaanaanga e ei mataoraanga no te urupu tangata tei tae mai i te matakitaki i tei raveia i te reira ra. Kia akameitakiia te Atua no tona aroa e tana Evangelia ora tei tae mai ki o tatou nei, tei kore tatou i akaroi i te akamaara i tera ra, i tera tuatau. Kia akameitaki katoaia ta tatou Kavamani no tei akatinamou i teia ra ei ra orote (public holiday), ei ra no te Evangelia. A teia mataiti ki mua kua teke te

nuku ki Avarua e ka riro katoa aia i te akatere i te au angaanga a te Konitara Ekalesia Rarotonga.

## 3. UIPAANGA MAATA 2009

I muri ake i te uipaanga maata i roto ia Tiurai kua, no tetai au tumuanga meitaki kua manako te kumiti akaaere kia tuku i te manako ki te Konitara Ekalesia Rarotonga kia akara akaouia te tuatau e raveia'i te uipaanga maata. Tei runga oki te apainga i nga Ekalesia i Rarotonga nei, i manakoia'i e, e mea manea na ratou e iki i te tuatau tei tau ia ratou no te uipaanga maata 2009. E maata oki te au tai'i ki nga Ekalesia i Rarotonga nei i roto ia Tiurai, te marama e rave ua iana te uipaanga.

Kua orongaia te manako ki nga Ekalesia i roto ia Aukute. A teia marama ki mua Titema i roto i tana uipaanga openga, akapapuia'i te tuatau e raveia'i te uipaanga maata 2009. Ka o mai teia akapapuanga ki roto i te nuti leta mua o te mataiti 2008.

No te au manako katoa tei rauka mai me kore tei orongaia mai i roto i te uipaanga maata i topa, teia te akaraanga o te porokaramu (draft programme) no te uipaanga maata 2009:

Sabati	Akatueraanga, Nikao
Monite	Iriiri kapua (workshop), Arorangi
Ruirua	Iriiri kapua, Titikaveka
Ruitoru	Uipaanga, Ngatangia
Paraparau	Uipaanga, Matavera
Varaire 6	Uipaanga, Avarua
Maanakai	Akangaroi
Sabati	Topirianga, Nikao

Tena ireira ta te kumiti akara mamao atu anga i te porokaramu, e 2 ra iriiri kapua, e 3 ra uipaanga. Kua akapapuia i te uipaanga maata i topa e, e 3 ra ra ka inangaroia kua oti te uipaanga.

## 4. TERE IRIIRI KAPUA NO TE KUMITI AKAAERE KI NUTI RENI

No te patiangia tei tae mai ki te kumiti akaaere i teia tuatau mei te Konitara Ekalesia Wellington (Porirua EKKA, Porirua CICC, Hutt Valley, Miramar), te tapapa nei ireira te kumiti i tetai tere apii/iriiri kapua ki teia nga Ekalesia i te **rua o te epetoma o Mati 2008**. Ko te au ngai tei anoano te Konitara Wellington kia akaravaia te akaramaanga koia oki te tuanga o te moni (finance), akateretereanga (administration), ture (constitution/policy), e pera tetai au tumu manako i roto i te Bibilia e vai tai'i nei rai ki tetai au mema. Penei paa ka pati katoa nga Ekalesia vaiata atu ki Wellington (Hastings, Palmerston North, Christchurch, Invercargill) kia piri katoa mai ki teia akakoroanga. Te akara katoaia nei penei ka rauka tetai porokaramu mei teia te tu i te akatupu ki Akarana e Autireria. Ka tapapa mai ra kotou e te au taeake i teia au ngai i te tuatau tau no te

akatupuanga i te reira. Te tamanakoia nei penei mei te 2 – 4 mata o te kumiti akaaere ka apai atu i teia tere.

**5. MATA OU I RUNGA I TE KUMITI AKAERE**

I te tuatau i te Orometua Nio Mare i Avarua, kua riro aia ei mata no te Konitara Ekalesia Rarotonga ki runga i te kumiti akaaere. Ko teia rai oki tei oti takere i te akanooia e ko te Orometua o Avarua koia rai te mata o te Konitara Rarotonga ki runga i te kumiti akaaere. I na i te Orometua Nio i teke atu ki Auckland City, kua riro ireira teia tuanga i te mono iatu e te Orometua Tuaine Ngametua tei teke mai ki roto i te Ekalesia mei Arorangi mai i teia tauanga Orometua.

Kua riro ana oki te Orometua Tuaine Ngametua ei mata no te kumiti Orometua i runga i te kumiti akaaere. E iaia i teke mai ki Avarua e ki runga i tona taoanga ou (mata no Rarotonga), kua riro atu ireira te mata o te kumiti Orometua ki runga i te kumiti akaaere, i te Orometua o Titikaveka i teia tuatau, koia oki Rev. Ngatokorua Patia. Ko te Ekalesia Otara Central oki tana Ekalesia openga i tiaki maina i mua ake ka teke mai ei aia ki Titikaveka. No reira tena te tienianga i runga i ta tatou kumiti akaaere.

**6. APIIANGA KI TAKAMOA**

Kua ariki te kumiti i te vaerua, te puapinga e te inangaro e kia akamatutua ma te akameitakiia te turanga o ta tatou anau tamariki e tomo nei ki te aua Takamoa. Ko te irinakianga ki konei koia oki kia rauka tetai turanga teitei, akono meitaki, matutu, e te vai atura, me akaoti mai teia au tamariki i ta ratou apii i Takamoa, ma te inangaro kia tavini meitaki ma te tau tika'i i to tatou Atua me tomo ratou ki roto i te Ekalesia. E maata oki te au tai'i i kitea mai i te au tuatau i topa, no reira te kumiti i manako ei e kia akatanoia teia au ngai tai'i i teia tuatau. Kare oki i tureti ake kia raveia teia; i roto i te reo papaa, never too late.

Ko tetai uatu Ekalesia e manako/inangaro nei i te tuku apiianganga mai ki Takamoa, tena te pepa patianganga (application form) tei topiri iatu ki muri i te ripoti a te Puapii Maata ki te uipaanga maata i teia mataiti. Me kare e apinga, tuku mai i te patianganga ki te Puapii Maata. Akaki ma te tuku tika mai i te reira form ki te Puapii Maata. Ka akapapa te Puapii Maata i te ingoa o te au tamariki te ka pati mai e to ratou tua tapapa, ka tuku mai ei ki te kumiti akaaere no te urianga e te akatinamouanga. Ko te mataiti o te apiianganga e anoanoia nei koia oki 18 – 35.

**7. OROMETUA TIAKI I TE EKALESLIA ONEROA**

Ko te tiaki i te Ekalesia Oneroa tei oti i te akanooia e te arikiia e te uipaanga maata koia oki e Orometua no Tahiti mai tei kore i tukuia mai ake te ingoa. Ko te tuatua nona i teia atianganga kare e akapapuanga. Penei i na te karere no Tahiti mai ei e i muri ake ia Me 2008, penei ka topa atu. Kare oki e rava ana te au Orometua o Tahiti ei tiaki i ta ratou rai au Ekalesia, e kua oti katoa oki ia ratou i te akanoo e okotai uake Orometua mei te Kuki Airani atu nei ka angaanga ki reira i te taime okotai. No teia tumuanga i ekoko ei te Orometua no Oneroa e i kore ei e rauka ia tatou i te tuku i tetai Orometua akaou ki Tahiti.

I roto i te uipaanga maata i topa uake nei, kua arikiia e kia akaokiia mai te Orometua Bosini Tekena ki runga i te akapapaanga tauanga Orometua. I te mea ireira e koia te Orometua openga e tiaki Ekalesia nei mei te pupu tei akatainu iatu i te mataiti 2001, kua manako ireira te kumiti akaaere i te tuku iaia kia tiaki i te Ekalesia Oneroa i teia tuatau. No te akamaramaanga i runga nei, takakore e eaa te roa ia Bosini ki Oneroa, penei me tae mai te Orometua i roto ia Me, penei no nga mataiti e 4 e tu mai nei me kare rai a Tahiti e rauka i te tuku mai i tetai Orometua.

No reira te tapapa mai nei a Bosini e tona ngutuare no teia kapikianga e mei ta te Ekalesia i pati mai, ka tomo aia ki Oneroa i muri ake i te pure epetoma 2008.

**8. TERMS OF REFERENCE OF CHURCH POSTS: URIANGA KI ROTO I TE REO MAORI**

I roto i te uipaanga maata i oti uake nei ko tetai pepa puapinga tei tukuia e te kumiti akaaere kia uria koia oki teia i runga nei tei tataia ki roto i te reo papaa. Kua ariki te uipaanga i teia pepa e pera te tamanakoanga e kia uria ki roto i te reo Maori.

Kua oti teia pepa i te uria e te tuku iatu nei ki te katoatoa raua ko teia nuti leta numero 14. Mei tei ariki katoaia i roto i te uipaanga maata, e kapi tetai i roto i teia urianga ki te reo Maori, no te tuanga angaanga a te Mama Orometua. Kua tataia e kua arikiia teia kapi e te Mama President, tena ia kua tauruia mai ki roto i teia urianga. Ko tetai uatu kare i tu me kore kite ana i te tataanga i roto i te reo papaa e kua anoano koe i tetai copy naau, akakite mai kiaku kia tuku iatu na runga i te email.

Mei tei akamaramaia ki roto i te uipaanga maata, te taoki akaou atu nei te akamaroiroiaanga a te kumiti akaaere ki te au Ekalesia kia taangaanga i teia tataanga ei tauturu ia kotou i te kite maramaanga i te turanga o te au taoanga i roto i te Evangelia, kotou tika'i kare e akatakaanga tataia mei teia te tu. Na kotou e akapiri atu i tena tataanga ki te turanga o ta kotou au Ekalesia tatakita.

**9. TERE O TE AVARUA GIRLS' BRIGADE COMPANY KI ONEROA**

I te Maanakai 13 Okotopa 2007 kua tae mai te toenga o te anau Girls' Brigade mei roto mai i te Ekalesia Avarua, ki Oneroa nei no to ratou akakoroanga apii. Kua aravei iatu ratou i te ngai akatoanga pairere pera te rave pure e te Orometua Toko Ongoua o Ivirua, te Tauturu Orometua o Oneroa, e pera tetai maataanga tangata i runga ia Mangaia. Kua rave katoaia te au arikianga kaikai no ratou ki roto i nga Ekalesia e 3 i runga i te enua. Mataora tika'i te araveianga i te anau tamaine e pera to ratou au arataki tei aru mai.

I te popongi Ruitoru 17 Okotopa kua orongaia te pureanga na te anau tamaine. E ngateitei maata teia tei rauka ia ratou. Kua oronga katoa mai ratou na te Ekalesia Oneroa, atinga rima oronga e te tauturu i te pae o te power, e \$300. Kia akameitakiia te Atua no teia manako meitaki e te maoraora tei o ki roto i te ngakau o te anau tamaine.

I te Monite 22 Okotopa kua akaruke mai te pupu openga o te anau tamaine no te oki atu ki te ipukarea koia a Rarotonga. Te akaaroa i teia araveianga ma te noonoo kapitianga ki te anau mei Rarotonga mai. Tau mari te tuatua tei na ko mai e, e atianga to te au mea katoatoa; e tuatau to te tae mai, e tuatau to te oki atu.

*(Tataia e te Tauturu Orometua o Oneroa, Torotoro K. Piti)*

**10. TERE NO ENUAMANU KI NUTI RENI E AUTIRERIA**

Kua teretere atu mei tetai 40 au mapu Atiu e noo ki Rarotonga nei, ki te enua Nuti Reni e Autireria i te marama i topa, Okotopa. Ko te akakoroanga marira no te kimi puapinga i roto tika'i i te iti tangata Atiu, no te akaouanga i to ratou ngutuare i Rarotonga nei ko tei tuatuaia e, Enuamanu III. Tena kua kite tatou e ko te ngutuare tapaeanga teia o te iti tangata Atiu i te pae mai i te National Auditorium i Avarua. Ko te hostel enua mua oki teia tei akatuia ki Rarotonga nei ei ngai akaruruanga no te iti tangata Atiu ia ratou i Rarotonga.

Kua pati mai nga akaaere o te putuputuanga kia oronga akakite iatu to ratou reo aroa e te akameitakianga ki te katoatoa tei tauturu mai i te akakoroanga i te au oire tei tere iatu e ratou i Nuti Reni e pera a Autireria. Kia kotou e te au Ekalesia tei akara ma te tauturu mai i te anau noatu e kare e akakiteanga i tae atu, kia akameitakiia te mana katoatoa no te ngakau maoraora tei kitea i to tatou araveianga. Kua rauka te puapinga e te tapapa atu nei ki te tuatau e akamata'i te angaanga ki runga i te ngutuare.

**11. ARAVEIANGA I MANGAIA**

I te 2 o te epetoma o teia marama Noema kua apai atu a Nga Mataio i tetai pupu tangata angaanga e 6 mei tona tipatimani tanu, ki Mangaia no te akakoroanga iriiri kapua no runga i te angaanga tanu, angai puakanio e te puaka. Ia ratou i reira, kua rauka te au akakoroanga o te pae vaerua i te akaoia mai ki roto i ta ratou porokaramu mei teia i raro nei:

Ruitoru 14 Noema	Popongi, pure Ekalesia ki Oneroa na Ngatoko Ta Ngatoko Jnr, tetai staff o te Agriculture tei aru atu i te tere. E Ekalesia oki a Ngatoko i Avarua.
Paraparau 15	Uipaanga na te Tekeretere Maata ki te Konitara Ekalesia Mangaia tei raveia ki Oneroa.
Varaire 16	Popongi, pure na te Tekeretere Maata ki Oneroa. I muri ake, angaianga na te Ekalesia i te tere mei Rarotonga mai.

Te akaoki akaou atu nei i te akameitakianga ki te Ekalesia Oneroa no te au tuanga tei oronga mai koe na matou i roto i te tere, e pera taau angaianga i te popongi Varaire. Na te Atua e oronga mai i te manuia e tau no te kopapa e pera to te vaerua.

Te rua o te reo akameitakianga, ki te au taeake, tuaine e te mapu tei tae mai ki ta tatou iriiri kapua, meitaki ngao kia kotou katoatoa, ta kotou arikirikianga ia matou

i te aiai Paraparau e pera ta kotou au apinga aroa ia matou. Kia manuia no te tuatau ki mua.

**12. NUTI NO TAKAMOA**

The exams are now finished and I am in the process of producing the Student's Reports to send back to their respective churches. This has been the practice over the years, in my capacity as Principal. The students are now cleaning up on campus before their vacation begins in December. And while on vacation the men students are encouraged to seek employment in town to support their families or for their Christmas & New Year shopping. There are no holidays for them in the outer islands and overseas, everyone will remain on the island.

Out of respect for my colleagues, I am now privileged to congratulate them for the hard work this year and this is extended mainly to the lecturers who had tirelessly offered their time and effort to teach our students. Overall, the General Assembly as well as the Executive Committee for the commitments and endless efforts made to support Takamoa Theological College. I, together with my wife Mama Mii, our children as well as the Takamoa Community, salute you all and may this festive season refresh the memories of the birth of our Lord and also the ushering in of the New Year. Seasonal blessings to you all. Te Atua te aroa.

*(Tataia e Rev. Vaka Ngaro, Puapii Maata)*

**13. TE EKALEZIA DULWICH HILL KUA AERE KI TONA REKAREKAANGA**

Kua akatinamou te uipaanga maata o Tiurai i teia mataiti i te Orometua Joe Atirai ei tiaki i te Ekalesia Dulwich Hill, Sydney, no nga mataiti e 4 e tu mai nei. Ko tetai Ekalesia oki teia i Autireria kua akamata takere, kare ra i akatainua ake no te mea kare aia i matutu tika'i ake no te apai i te au apainga tei anoanoia.

I muri ake i te uipaanga maata, kua akakite mai teia Ekalesia ki te kumiti akaaere e kare aia e inangaro i te Orometua tei akanooia nona no te mea kare e rauka iaia i te utuutu i te Orometua. Kua tuku atu te kumiti i teia manako ki te Orometua ma te ui i tona manako. Teia ta te Orometua, kare e manamanata, nana rai e utuutu iaia me tomo aia ki roto i te Ekalesia, kare aia e tuku i te apainga ki runga i te Ekalesia. Kia akaoki iatu teia manako o te Orometua ki te Ekalesia, teia te pauanga i akaokiia mai, ko te Orometua akatainua ouia koia a Fakeau Joseph tana ka inangaro.

Noatu te maata i te au karere akamarama ki teia Ekalesia e ka na mua te au Orometua e angaanga nei i te tukuia ki roto i te au Ekalesia, kare rai i akarongoia maina ta te kumiti akaaere e pera ta te uipaanga maata. E karikao pao ngata rai i na te Mangaia ei.

I roto ireira i te 32<sup>nd</sup> uipaanga a te kumiti akaaere tei raveia i te Paraparau 27 Tepetema 2007 ki Takamoa, kua akanoo te kumiti i te manako e kia tukuia teia Ekalesia kia aere ki tona uorai anoano e te rekarekaanga. Teia oki te aiteanga, kare te Ekalesia Dulwich Hill i raro akaou i te tamaruanga a te CICC.

E mea akaaroa teia tei tupu. Me ka akara ua oki te kumiti i teia tu, kua puapinga-kore ireira te tukuanga tika a te uipaanga maata e pera te patianga a te kumiti akaaere. E ngari ake kia akatanoia teia manamanata i teia taima. Me akaruke uatu, ngoie ua ireira i te au Ekalesia i te aru i teia mataara a teia au tauiaanga Orometua ki mua.

**14. AKAPAPA'ANGA TUATUA**

I roto i teia nuti leta, ka tatau tatou i te akapapaanga tuatua o **Papa Tuti Taringa**, tavini maroiroi no te Atua i roto i te Ekalesia Titikaveka, mata i mua na ki runga i te kumiti akaaere no tetai tuatau roa, Mataiapo no te kopu tangata Raina. Tena tona tua tapapa kua topirii mai ki muri i teia nuti leta (**Annex**). Ko te 7 teia o te akapapaanga tuatua te ka tukuia ki roto i teia nuti leta. Te tuera nei rai te ngutupa no tetai uatu tei anoano i te taangaanga i teia nuti leta no teia akakoroanga. Tuku tika mai i te tuatua kiaku e tetai tutu.

**15. TE KAPAKAPA NEI TE PEAU O TE MATAITI**

E te au taeake ma te au tuaine, te akavaitata akaou atu nei tatou ki te tuatau e rekareka ngakau ei tatou i te akamaaraanga i te ra i aroa mai ei to tatou Atua ia tatou te tangata ara nei, na roto i te oronga anga mai i tana tamaiti anau tai, ei akatinamou i to tatou irinakianga e te oroanga ki roto i te akarongo. E tuatau timataanga katoa oki teia i te tavarenga anga i to tatou ngakau kia akara tamou ki to te ngutuare e te au mea tei anoanoia e to tatou au kopapa. I te mataiti ou e tu mai nei, kare e ekoko e te angaanga nei to tatou au manako i te kimi anga e, eaa ra ta tatou ka rave ei akapuapinga atu i to tatou nei oraanga kopapa. Ka aere kiea picnic ei, ki toai kainga te BBQ i teia mataiti, e te vai atura te au mea e o maina ki roto i te manakonakoanga. Kare oki o kotou puapinga me kare au i rotopu ia kotou i na Iesu ei. No reira na roto i teia tuatau mataora ta tatou ka tomo, kua marama tatou e ka akaoki ua rai tatou i te akameitakianga ki te Atua no tona aroa maata ia tatou te tangata ara nei.

Te rauka nei ireira iaku i te oronga akakite atu i te reo aroa o te au mema katoatoa i runga i ta tatou Kumiti Akaaere i teia tuatau, i to ratou reo aroa kia kotou katoatoa no teia tuatau akaepaepa anga ta tatou e tomo atu nei. Kia riro te tuatau Kiritimiti ei mataora anga no tatou i roto i te ngutuare e pera ei tuatau akavaitata atu ki te Atua, e pera kia riro te mataiti ou e tu mai nei ei mea meitaki atu i teia ta tatou ka akaruke. I roto i tetai ao mai reo o tatou, Merry Christmas and Happy New Year to you all mei roto atu i te Kumiti Akaaere.

**16. POPANI**

Tena ireira e te au taeake ma te au tuaine te au mea tei anoano ta kotou kumiti akaaere kia oronga akakite atu ei kiteanga na kotou i te au mea e tupu nei, e te paraniia nei no teia au tuatau ki mua i roto i ta tatou nei akonoanga CICC. Irinaki matou i runga i te kumiti akaaere e ka riro teia au akakitekiteanga ei pumaana ki roto i to kotou au ngakau tatakaitai. Me e au manako to kotou i te akameitaki atu i te turanga o teia nuti leta, ka rekareka au kia tuku tika mai kotou i te reira kiaku.

Ei topiri i teia nuti leta, te na ko ra a Zekaria:

*Kia rekareka maata koe e te tamaine a Ziona e, ka maeva na e te tamaine a Ierusalem e; i na te aere maira to ariki kia koe ra; e tuatua-tika tana e tei iaia te ora, e akaaka tona e te noo anga ki runga i te asini, e te punua oki, te anaunga a te asini. Rejoice, rejoice people of Zion. Shout for joy you people of Jerusalem. Look, your king is coming to you. He comes triumphant and victorious, but humble and riding on a donkey – on a colt the foal of a donkey.*

Ei konei tatou i te tuatua akakiteanga i tona aroa opekore uatu rai, Amene.

ITEMS SOLD AT THE TAKAMOA CICC OFFICE

Good News Bible	\$12
Maori Bible: Hard Cover	\$20
Soft Cover	\$45
Hymn Book: Soft Cover	\$12
Hard Cover	\$10
(out of stock)	
Order of Service Book	\$12
Daily Bread	\$2
CICC Flag	\$100
Gospel Day 2007 DVD:	
For one	\$20
Set of three	\$50
Ekalesia Record Book	\$35
Burial Record Book	\$45
Baptism Record Book	\$45

Send orders to: Tekura Potoru  
Director of Publications  
CICC Takamoa  
Rarotonga, Cook Islands

Phone/fax/email as per page 1 of this newsletter.

# ANNEX

## PROFILE OF PAPA TUTI TARINGA



Papa Tuti Taringa (middle) with his son Tapiti and daughter-in-law Ngametua

## **AKAPAPA'ANGA TUATUA NO PAPA TUTI TARINGA**

*Tataia e Tekura Steak Poturu, Director of Publications*

### **AKATOMOANGA**

Kia Orana tatou i te aroa maata o te Atua. Teia te irava akaaravei'anga no tatou, Isaia 6:8, "Kua akarongo atura au i te reo o te Atua i te na ko anga e, Koai taku e tonono? Koai te ka aere no tatou? Kua karanga atura au, I na, teia au, ko au taau e tonono."

### **RAUTUTI TARINGA**

Kua anauia aia i te ra 15th Peperuare 1922. E 85 o Papa Raututi mataiti i teiane.

### **TAVINI I ROTO I TE EKALLESIA TITIKAVEKA**

I te mataiti 1950 kua riro mai a Papa Tuti ei mema Ekalesia. I te mataiti 1955 kua akatainu iatu aia ei Diakono i roto i te Ekalesia Titikaveka e kua mou aia i teia taoanga e 43 mataiti. I roto i te mataiti 1998 kua tukua te taoanga Elder ki runga iaia e tae ua mai ki teiane ra. Kua riro katoa mai ana a Papa Tuti ei Opita Boys' Brigade e pera te Puapii Apii Sabati. Kua mou katoa ana i te taoanga Tekeretere no te Ekalesia no tetai 15 mataiti. E metua maroiro i te tavini e te rave i te angaanga i roto i tana Ekalesia e tae ua mai ki teia tuatau.

### **TAVINI I TE AKONOANGA CICC O TE KUKI AIRANI**

I te mataiti 1974 kua ikiia mai a Papa Tuti ki runga i te kumiti akaaere o te CICC ei mata no te pa enua tonga. I te mataiti 1976 kua mou aia i te taoanga Tekeretere no te Konitara Ekalesia o Rarotonga no tetai 4 mataiti. I te tuatau i takake ei te Orometua Ngateitei a Papa Tekere Pereiti kua riro e na Papa Tuti i tiaki i te taoanga Orometua Ngateitei e tae uatu ki te tuatau i akatainuia'i te Orometua Tangimetua Tangatutai ei Orometua Ngateitei. I te mataiti 2003 kua akangaroi mai a Papa Tuti mei runga i te au taoanga tana i mou ana i roto i te kumiti akaaere.

### **TAVINI I ROTO I TE KAVAMANI**

Kua tavini katoa ana a Papa Tuti i te Kavamani Kuki Airani no tetai tuatau roa. Teia i raro nei te akapapaanga i tana au angaanga i tona tuatau i roto i te Kavamani:

- Mataiti 1950 kua tere atu a Papa Tuti ki te Pa Enea Tokerau no te akaaki'anga mai i te apii ki raro ake i te akatere'anga a te Kavamani. I te reira tuatau tei raro rai te apii i te London Missionary Society. E riro ana te au Orometua ei akateretere me kore tiaki. Kua tere atu aia ki Tongareva e ko te Orometua Alfred Tekeu te akaaere o te apii i reira. Mei reira kua tere atu aia ki Manihiki e ko te Orometua Eliaba Benioni te akaaere o reira.
- I te mataiti 1952 kua taokotai katoatao te apii o te Pa Enea Tokerau ki raro ake i te tamaruanga a te Kavamani. Kua riro oki teia ei mataora no te Pae Apii i te reira tuatau.
- I te mataiti 1953 kua riro mai a Papa Tuti ei Puapii Maata no te apii Titikaveka no tetai 4 mataiti. Mei reira kua tuku iatu aia ki Nuti Reni i roto i te ngai tereni'anga Puapii no tetai 7 marama. I roto katoa i te reira mataiti kua tere atu aia ki Peritane no runga i te urianga i tetai au tuatua papaa ki roto i te reo maori. Mei reira kua oki mai aia ki Rarotonga nei i te mataiti 1958.
- I te mataiti 1959 kua ikiia mai aia ei Tauturu Puapii Maata no te Apii Avarua no tetai tuatau roa.
- Kua riro mai aia ei Tekeretere no te Tipatimani o te Internal Affairs i te mataiti 1970 ki te mataiti 1973.
- I te mataiti 1989 kua riro mai aia ei Vaa Tuatua no te Paramani e tae uatu ki te mataiti 2000. I roto katoa i teia nga mataiti kua riro mai aia ei Deputy Governor. Kua manako mai aia i te eke mai mei runga i teia taoanga no tetai akakoroanga puapinga. No te reira mataiti oki a Papa Tuti i ikiia mai ei no te tiaki i te taoanga Orometua Ngateitei. Kua akakite katoa mai a Papa Tuti e i te tuatau i tae mai ei te tuatua e nana e tiaki i te taoanga o te Orometua Ngateitei, kua riro teia ei uiuianga ki tona ngakau e ko teiea tana ka apai, me ko tana angaanga Kavamani me ko te taoanga i roto i te Evangelia. No tona inangaro i te tavini i te Evangelia a te Atua kua eke mai aia mei runga i te taoanga Vaa-tuatua i roto i te Paramani. Teia te tumu no te mea kare e rauka iaia i te tavini e rua pu, mari ra okotai.

### **TURANGA I RUNGA I TE ENUA**

Kua ikia mai a Papa Tuti ki runga i te taoanga Raina Mataiapo i te mataiti 1986 e te mou nei rai i teia taoanga. E mema katoa aia i roto i te Koutu Nui. E metua mou korero a Papa Tuti, e riro katoa ana aia ei vaa korero me kore akamarama i tetai au korero no runga i te marae, te au Are Pure e pera tetai au ngai puapinga i Rarotonga nei.

### **TONA NGUTUARE TANGATA**

E 8 a Papa Tuti tamariki, e 6 tamaroa, e 2 tamaine. Ko tana au tamariki teia na tana vaine mua. Kua takake atu tona tokorua mua. E maata uatu rai tana are-mokopuna e pera te ina.

### **TE AU AKAIRO TEI RIRO EI AKANGATEITEI IA RAUTUTI TARINGA**

1. Sir Maui Pomare Medal 1937
2. Queens Silver Jubilee Medal 1979
3. MBE
4. MOIF Medal
5. Deputy Governor



**Responsibilities for this issue/tei angaanga ki runga i teia nuti leta:**

- ◆ Typing/editing/layout/emailing - Nga Mataio
- ◆ Proof reading - Marianna Mataio
- ◆ Printing - Steak Potoru
- ◆ Contributors with articles - Torotoro K. Piiti, Steak Potoru,  
Rev. Vaka Ngaro

*Comments on the format and presentation are most welcome; please send them to the Editor.*